

宋蘇魏公文集



蘇魏公文集卷五十四

宋太子太保右僕射同中書門下平章事司空魏國公蘇頌撰

魏國公蘇頌撰

清兵部侍郎都察院右副都御史四川總督大理寺少卿裔孫廷玉重刻

碑銘

二樂陵郡公石公神道碑銘

某嘗爲史官躬覽國籍伏見祖宗列聖進用輔臣其選至
遴雖軼才偉望或夙遭際會已知其可用矣然猶舉於衆
試之以事功實著見而後命之太祖皇帝以神武定天下
左右將相皆文武大勳猶曰宰相須用儒生仁宗皇帝臨
御歲久英豪羣萃後元命相謂學士曰前王求賢於夢卜
朕爲取人望蓋聖主任輔相爲天下公不以己私進退愼
蘇魏公文集卷五十四

一

重如此居其位者有不得人乎考簡冊之所載洎士論所
傳聞事迹之顯著者於樂陵石公僕射少師父子見之詳
矣僕射自太宗皇帝潛邸歷藩僚府佐者十餘年逮天飛
已踐左右省侍謂不待資級便當入輔初政然卒以湘潭
之勞升近侍叅宥府從征太原乃進上樞少師以功臣子
早得名位更真宗仁宗兩朝文林詞禁老於近班乃豫政
事故主明佐良克有始卒魏鄭公所云君公顯號臣荷美
名其是之謂乎謹案石氏之先胙土於衛邑相國於漢世
都督於晉代其後自趙徙溫隋唐以來又徙河洛今爲河
南府洛陽人唐客省副使諱質贈太子太師太師生幽州
節度判官諱延威贈太傅太傅生處士諱繼遠贈太師太

師生僕射諱熙載字凝績少長五代戎馬間獨守先代爲諸生周顯德二年舉進士宗伯尙書竇公儼稱公所試賦有致君育民之志擢置上科自是聲振京洛間韜光待用不應諸侯辟命建隆初太祖受周禪太宗開侍衛府召公入泰寧軍節度使幕爲掌書記尹正京邑奏爲府推官昭憲太后特召入見卽日拜右拾遺充職再轉左補闕幕府文書畿甸牒訴悉委參畫凡經裁處皆合上意旣而遭太師憂方議墨衰權奪適有飛語聞於朝廷遂格除出爲忠武軍掌書記再徙崇義公識度沈遠不以內外爲間參贊如常僚太宗踐極之月召復衰職上方蒐擇天下賢俊黼藻人文之化命公同知太平興國二年貢舉號稱得人故

蘇魏公文集

卷五十四

二

相司空張文定公翰林韓公丕給事徐公休復皆進士甲等也未幾梅山蠻獠寇湖外偏師南討以公權知潭州軍州事督軍戎拊疲瘵踰年湖嶺悉平入以尙書兵部員外郎充樞密直學士歲中以本官兼職同簽書樞密院事學士簽書院事自公始也五年車駕幸河東遷給事中樞密副使繼元銜壁卽行在進刑部侍郎充職如故六年制授戶部尙書充樞密使公以純誠結主更試中外入爲心膂出爲股肱夷險一節上心知其賢欲倚以爲相故位秩屢進自尙書郎纔二暮升省座而素苦足疾至是稍妨朝謁上親至樞密院視醫灸久之賜告居家將護一日所苦浸劇乘輿幸其第問勞如平生勅上醫旦夕診治又賜手札

有忠孝之事衆所聞之之語又曰火艾久遠得力亦當大
災觀詔旨懇惻如此屬任之意可知也公益畏盈滿累章乞
骸辭情切至上不能奪八年秋特制超拜尙書右僕射聽
解樞柄國朝故事不歷平章事未有升端揆者上以素有
爰立之屬故以授之寵數雖厚而疾不加損九年正月某
日竟以不起聞上哭爲之慟卽日往臨其喪罷朝葬禮皆
加常等詔贈侍中有司謚曰元懿上悲歎累日顧謂侍臣
曰熙載事君之心可謂純正無他適當委用奄忽至此深
可惜也近世執政旣罷而卒車駕臨視亦自公始咸平二
年八月詔配享太宗廟廷慶厯某年加贈太師中書令兼
尙書令追封代國公夫人清河張氏南陽郡太夫人繼張

蘇魏公文集

卷五十四

三

氏安定郡太夫人皆以子豫政推恩也二子長中孚早逝
次卽少師也少師諱中立字表臣生十三年而僕射薨居
喪如禮天子欲速官之一命爲西頭供奉官早服名教不
爲綺襦事折節讀書從諸儒游誦六經百家言作爲詞章
如老成人十八獻文闕下換光祿寺丞賜朝散服咸平三
年以殿中丞入書館爲直集賢院屬時右文天子修盛德
之事君臣賡歌雅頌之音播四海內相楊文公一代英才
主盟斯文公與中山劉公筠潁川陳公越成紀李公宗諤
游其藩更唱迭和合如一律朝廷每有論撰公與諸公常
在其選而公猶勤鈔摘中外書無不請校有疑舛不輕譴
僮一經其手四庫以爲善本入尙書省爲員外郎以祠部

判三司理欠憑由司以刑部賜銀青服兵部充鹽鐵判官
遷郎中以禮部判南曹移戶部勾院仁宗卽位轉戶部充
史館修撰糾察在京刑獄天聖四年以吏部知制誥同知
貢舉歷諫議大夫給事中景祐元年入翰林爲學士轉禮
部侍郎加承旨兼龍圖閣學士於時公踐臺省幾四十年
近司要局文武選部無不總領朝廷典章文物無不綜練
兩禁雜定見謂議論有餘而未嘗矜已上以爲長者可用
四年拜叅知政事在位謹文墨循故事不求赫赫名明年
罷爲戶部侍郎資政殿學士判尙書都省久之加大學士
兼提舉祥源觀慶歷四年告老於朝以太子少傅致仕皇
祐元年遷少師其年八月某日薨於私第享年七十八天
蘇魏公文集卷五十四

子廢朝有司歸賻如禮太常諡曰文定夫人張氏先亡後
夫人王氏封太原郡夫人七男曰居簡少以文名顯諸公
間終太子中允集賢校理曰夷簡大理評事曰昭簡太子
右贊善大夫皆早天曰從簡國子博士服公喪甫五月以
毀卒三女子長歸孟氏次范氏次沈氏七孫男曰祖仁祖
賢祖元祖方祖良祖溫祖冲惟二公父子相繼逢辰得位
立朝有勲節祀大烝易大名其踐揚如此若其操行履方
士大夫所稱道者又可得而述焉僕射事太宗由府從事
至右相更中外筦樞極恭乃職一乃心造辟而言奉制而
行是非好惡無所顧避上深督其忠實委任眷待終始不
間時論稱其長者事繼親牛太夫人服勤竭力雖躬負沈

痾無一日廢定省甚則扶杖而前不見疲曳之容母弟終喪欲還本宗公曰在同亡別豈如存之事不聽其去分貲保任與同氣等其在官也主平恕通簡居顯要不異小職時事劇易一切倚辦待士盡禮敬出己上者不能屈在下流不能怨志欲成就人物表甥故叅知政事趙公昌言少將二親依公家躬爲教誨授書學文至長立遂以大顯素善梁縣令蕭守勲後貧困公分祿以贍及卒遺四子該公悉爲婚姻不失時如蕭之存親族之孤寡不能立者聚而衣食之僮隸之吉凶不能舉者憫而資給之聞公之風者歎慕而則効故趙公作銘以敘其事曰公忠孝恭義惠全德具美求之古人無間然觀斯言則公之行實可悉矣其

蘇魏公文集

卷五十四

五

家政門法蓋有繼述者焉少師樂易寬裕出於天資行不爲崖異仕不爲苟合操修施爲惟才分是守自解褐掛冠未嘗去朝廷淡然安所職凡領二十官五學士皆久次平除徊翔禁省幾遍而不處急流平時比牒並肩或子姪行多躐取右職獨無一語咨歎對上前有所問但援故實沿革復熟講解聽上裁可議者謂真得儒臣體在政府時有啟奏不顯斥是否或見聽納終不漏一言內制除命多不傳藁其慎密不近名如此故平生寡過惟在外制日一坐舉官不如狀奪修撰糺察爲員旣不多取名又能協和與衆故未嘗爲人所訾怨蓋古所謂明哲保躬者與善與人交凡遊從無親疎貴賤先後輩相與宴飲笑語諧隱疊疊

不窮終無一言忤物嘗以論議小戾楊公退而移書引咎
自責不逮及相歡如初乃己家素饒財少時悉聽諸父昆
弟掇取不問有無所羨卽用爲賓客飲食費晚年產入比
其初纔二十之一亦不增殖惟待俸賜以爲養退居遭疾
醫藥不給仁宗知之特賜白銀三百兩及薨第舍無存者
喪事待賻而後具世稱其清尙書宋景文公評之曰如公
才能門閥使之少事聲利蘄黨助畜先資徇務近時則亟
顯而易富今舍是不爲非蹈道者莫能辨其得失雖然初
若偃蹇難進卒以長者大用是何耶聖主知人明而進賢
之道廣也嗚呼二公之進退所存見於事業者又若君子
之澤必在其後歿世五十年而顯者蓋寡其有待耶元祐

蘇魏公文集

卷五十四

六

中予爲吏部尙書嘗言於上僕射太宗功臣少師仁宗執
政其後嗣獨一孫祖溫陞朝籍名臣之世宜蒙褒顯祖溫
自爾稍見任用今爲朝請大夫利州路轉運判官樂陵之
裔其庶幾乎石氏自唐占數河南世墓皆在雒陽縣宣武
原二公繼封樂陵郡亦不去雒薨皆歸葬焉僕射食實封
一千七百戶爲侯爵其葬也以太平興國九年四月十三
日少師食三千七百戶爲公爵其葬以皇祐元年十二月
某日二塚並祔太師塋之次穴子孫從葬者又數世矣闕
垣之松檟森然如林盪矣朝請君旣承祖重每念孤立寡
兄弟懼弗克勝後事惟是修飾坟墓表章遺烈可以塞嗣
人之職謂予嘗有言詳知本末礪石礎道求文以終其事

其請甚勤至於數四故不得辭銘曰

宋有良臣世席台宰文學彬彬吉士藹藹運屬勳華相惟
元愷君臣一德旦暮千載西樞東府謀謨亮采武律文經
光天之粹懿行清規爲時模楷四朝百年遺風未改猗與
樂陵之宗德音如在藝祖天飛羣龍翼隨朱邸元僚風雲
並馳漸階記室試劇王畿神功求舊協贊惟幾南抗州節
珍療平夷北從戎路俘元走奚奮庸宅揆同儀鼎司雖稽
拜袞卒配烝彝於戲元懿之勳一何巍巍章聖治定仁皇
繼聖樂善好賢詢咨舊姓英俊並遊義理相應鳳披鑾坡
代言書命徊翔二紀不綵不競終以夙望參毗大政難進
易退委遠時柄歸老都門考終順正是爲文定之行後終
蘇魏公文集卷五十四

七

有慶盛矣二公孰亢厥宗象賢是繼克紹餘風田園將蕪
門闌益充鞏洛天中三世邱封維祖維父墳厥相通維孫
維子堂構斯崇載銘隧路丕昭世功嗚呼樂陵之塋垂裕
無窮

秘書丞贈太師劉君神道碑

惟劉氏世爲望族蓋二漢享國歲久分王子弟幾徧天下
千餘年間小宗別子枝離派析或顯或晦散在四方而河
間之胄自章帝之子開始胙王土傳國久遠遂居河間之
樂成王之十世孫通仕後魏封樂成侯樂成今樂壽是也
樂壽之族其別有四一徙尉氏一居饒陽一在平昌一留
故土不去其後尉氏有仁軌以功名顯饒陽有君良以孝

友聞平昌有黃以文學高第名重當時惟樂壽之子孫最多至以劉名鄉其仕者或入朝爲郎官或入諸侯幕府無甚達者侯之裔孫曰績避地遷安陵以財雄鄉邑而不仕宦安陵今日將陵隸永靜軍之東光縣累世葬其地曰五德鄉遂爲東光人績之四世孫曰崇少長謹厚輕財好施子鄉里稱善人有子曰盛克繼父業盛之子曰溫潛德鄉閭號稱處士溫子曰格力儒自奮治左氏春秋兼通公羊穀梁二傳景德初契丹來侵瀛關郡督士民城守以功補三班奉職試書判入等改吏銓選終滄州觀察推官生三子長曰允恭治毛詩次卽府君也諱居正字安行季曰居業並承家學舉進士府君中天聖二年丙科歷大名府館蘇魏公文集卷五十四

陶棣州陽信二主簿陽信圭田之入素厚然無見土大姓有占各輪租以庇里役者府君案實履畝取租無土者皆除其空簿使歸役籍郡官初哂其迂且疑其獨異他日訟起旁縣扳援證逮連坐者十餘人始悔不用其言遷漢州軍事推官用薦者改秘書省著作佐郎知青州博興縣兼兵馬監押劄劇析煩治爲一道最邑之富民李氏之子嘗與進士鄉貢使氣任俠陰結貴要以張聲勢至使郡大吏移書縣官斬善遇之府君得書立捕於廷下疏其前後不得情不治毋乃惠姦乎對曰知過能伏釋之所以勸善於是或者又歎其恕而有教就移道州江華縣楚俗喜訟雖健

令決之盡理猶恥不勝則又赴訴於州於使者前後相望
弊浸不革府君則悉索新舊案牘剖析開譬使之曉然兩
造皆懾慄而止監司知其能多以他郡疑獄屬之若衡陽
譚氏訟家產事屢劾不能竟府君一訊情得不復異詞自
是遠近信聽訟獄爲之衰少至嘉祐中有令曰黃照亦以
恩信得人其里氏爲之謠曰我民無忘前劉後黃至今東
南人猶能誦之凡世之言吏治者蒞事明察或喜於得情
而以不失有罪爲能持心平恕或狃於不忍而以省刑縱
出爲允是皆中有所徇者不中情實遂成偏黨之蔽若乃
明恕兩得切近人情察見奸伏而舍其旣往不自以爲明
治有威愛歿且二紀而人猶懷其德此其實跡明效見於
蘇魏公文集卷五十四

九

事爲者非夫至誠不疑內恕及物其能致是乎府君壽四
十有四官秘書丞自江華千里鞠獄衡陽遘疾考終於官
舍時康定元年八月初十日也夫人陳氏都官郎中希古
之女先府君一年而逝生二子伯孳嘉祐四年進士甲科
歷監察御史御史中丞尙書左右丞中書門下侍郎尙書
右僕射今爲觀文殿學士知鄆州兼京東北路安撫使仲
周六幼不育女子四三適人壻曰梧州司理叅軍梁諗某
郡尹之才某郡唐灌一幼亡孫男四曰跋雄州軍事推官
前知鄭州管城縣曰蹈奉議郎早亡曰躋越州會稽縣主
簿前監國子監書庫曰路右承務郎孫女三壻曰右承務
郎蔡蕃韓城右承務郎趙仁約曾孫男七曰長吉長庚長

守長歷長言長廣長書而長吉長書皆右承務郎曾孫女
未嫁此其家世源流之遠非積德之報孰能盛大如此乎
府君好學敏文詞平生所著甚多以早亡弗克編輯放失
之外今有論議詩賦雜文總若干篇嗣子類次爲二十卷
藏於家少好書籍初模範二王後兼採唐人用筆法有得
其行草帖者至今猶藏弄以比李西臺建中其篤學多藝
雖出於天資然亦家法所漸有自來矣府君早失怙恃昆
弟敦睦敬上撫下家庭雍雍世故饒財其弟年少好遊數
欲析產府君弗忍亦不能奪辭所分又不得因受臨津田
數百畝陰畀族人佃之終不取也及官陽信買渤海田占
於郡籍而躬未嘗一到其歲租亦以贍族人以墳墓所在
蘇魏公文集卷五十四

十

爵里惟稱東光府君性莊重寡言望之若有標置而卽之
甚溫訓子極嚴或勉以一子蓋少縱之耶答曰政以一子
故不可不爾耳其亡也子纔十齡夫人之季弟孝若從行
在旁伯氏得訃自蔣陵走五千里抵衡陽與孝若擁孤輿
視歸鼓東光佛寺其孤煢然服衰寓外舍鄉人共哀之伯
氏曰吾弟孝友不欺鬼神所鑒豈止是而已也士大夫知
者亦曰斯人世著德義其興未艾也熙寧四年丞相爲御
史謁告於朝自東光奉府君之柩自將陵遷大王父母王
父母以八月庚申同葬於鄆州須城縣盧東鄉太谷山之
陽將陵故坐封植久矣比歲數有河患乃謀改卜三世同
塋用甲庚壬穴山陽重岡水出辛兌地合寶典語堪輿者

咸曰劉氏其不亡矣初丞相自御史至中丞五經需恩累贈府君自尙書屯田員外郎至通議大夫夫人自福昌縣太君至潁川郡太君由執政泊元祐四年明堂恩兩贈處士君太子少保妣倪氏北海郡祁國太夫人推官太子少傅太傅妣李氏隴西郡崇國太夫人府君太子少師太師夫人潁川郡康國太夫人又以宰相初拜贈處士司空妣衛國推官司徒妣定國府君太尉夫人慶國七年以殿學士郊恩贈推官太傅妣韓國府君太師夫人燕國三世墟墓以一品封域崇臺築闕如令丞相殿本邦歲時展省以牢醴奉祀又得造浮屠於塋側勅號將陵寺曰崇先承慶須城寺曰昭善崇報每歲興龍誕節得度淨人如例追崇蘇魏公文集卷五十四

顯赫極人臣之榮非獨稽古之力抑孝誠所感神之聽之信不虛矣府君歿世三十年而葬有故太常少卿任公粹爲之狀故叅知政事元章簡公爲誌葬之二十有三年又有今龍圖閣待制趙公君錫狀其逸事以告史氏於時丞相鎮天平之二年將勒銘神道假文于嘗僚某某與丞相遊從有素望府君爲前達雖未嘗接迹固亦講聞其德義矣然於闕閱蓋有不知今考三公誌狀與所聞皆合故得詳述其本末以慰孝嗣追遠之志而系之以銘曰
公侯之興有來自遠源流深長支實蕃衍武穆文昭不興者鮮盛德有後雖微必顯奕奕劉宗肇於沛豐河間樂成漢魏再封世逾十八爰逮司空系胄蟬聯慶鍾在公公以

學仕文科丙第資適逢時儒雅飾吏婉婉通閨徊翔中秘
德厚位卑光流後裔有行有言鄉黨稱賢不取中貲無占
虛田明見隱匿仁寬宿愆人謂陰德其後信然英英冢嗣
國之碩輔據鼎廟堂擁麾帥路故國新邦便蕃寵數惟孫
暨曾稟承厥緒大谷之陽有封若堂坎庚壬申三世之藏
葬以士禮朱芾銀章祭則三公衮衣黼裳遺風餘烈有銘
在穴耽耽梵宮峩峩石闕拱木成林豐碑象碣於昭德音
綿祀無絕

隴干姚將軍神道碑銘

皇城使雅州刺史姚君兕與其弟西上閣門使英州刺史
麟旣葬其先府君三十有五年矣會天子熙寧十年冬十
蘇魏公文集卷五十四

十一

一月親郊肆赦推恩在廷得以追賁先世如故事於是列
上府君前此所贈官加贈某衛大將軍制書始下伯仲相
語曰著令三品得立碑墓左我先人以忠義死於國事關
隴莫不稱其大節雖壯年齒闕不克終其功名而吾兄弟
幸得承緒餘班朝列蒙國厚恩漏及泉壤者數四矣然而
丘墓未表神道不嚴非所以旌功烈而崇孝思乃狀其闕
闕丐銘史氏時予適與英州同使臨潢每接緒談必及先
世因得詳其本末遂揭辭於螭石云將軍諱寶字某家世
五原人父諱某少以武健稱其挽強中遠蓋有絕於人者
故鄉里皆以硬弓目之羌人與相遇輒喘慄不敢校景德
元年曹武穆公瑋守鎮戎知其可任召與語曰若知六盤

山西良田萬頃久陷敵強若能以力開拓歸中原則世爲邊圉將不亦善乎於是發私財募五原子弟千餘人大城隴千遂闢其西境四十里築壘其旁土人謂之姚氏堡曹公嘉之爲四寨民兵巡檢後敵使南牧隆洎河有勞聞於朝廷未推賞而卒關隴之人咸謂功顯名晦必將有後繁衍之澤其在將軍將軍好學知書長於騎射以翹勇繼父任前後降黨留生羌破烟景雲等番部功名居最守將連章薦其材武仁宗皇帝召對便殿擢左侍禁隴千都巡檢時元昊負固西師連年不解將軍獨乘一障志期自效康定元年春賊欲由東沿川乘夜寇邊掠近山居民將軍得其要領陰募死士至期伏隘路縱賊入境居民悉遷避他境賊無所得旣歸伏發鼓噪迎擊斬馘甚衆其獲生口悉留不殺亦不自言功由是邊人歎服而謂有陰德前後大小三十餘戰皆爲先登體被數十創而勇氣不讐親友或勉之云數以孤軍當賊鋒萬一失利餌敵何益異時遇寇宜稍居後殿以奇謀破敵足以邀美利不失爲良將也將軍以謂凡被堅執銳者望敵聞聲便當奮擊何暇自營顧慮而以軀命爲計乎苟不負國家雖死寇讎吾得其所矣定川之戰涇原副帥葛公懷敏與敵較者十餘日官軍不利將軍同陷於賊朝廷惻傷優制贈某衛將軍厚卹其家官諸子弟者幾人是役也雖軍帥失律偏師不返而殺畧敵騎破盪區落蓋亦相當自是元昊勢益窘矣未幾遂有納

降之請則諸將死戰功不爲薄嗚呼古所謂名將帥者或
建殊功或立奇節或自致富貴或不脫患禍蓋義之所在
不以勝敗爲重輕若將軍起疆陲捍邊圉雖不能俘戎首
覆敵巢以成其宿志然躬當矢石卒死敵境顧其平日自
誓之志是豈苟免以蹈不義者耶古人所謂援枹鼓立於
軍門使百姓皆加勇焉者其將軍之謂乎其後二子以才
畧相繼取貴仕七孫皆用戰多補官抑由忠義之訓貽謀
來葉卒如隴人之言云耳夫人同郡杜氏實生三子仲曰
熙早卒兜麟孟季也累封壽安縣太君以熙寧八年二月
終於秦州季子官舍其婦德家範具於涇原帥龍圖閣直
學士王公才叔之誌焉將軍以慶厯二年冬十月二十二
蘇魏公文集卷五十四

日歿於陣以明年閏九月某日葬於朝那縣中安堡隴絡
川之北峽杜夫人後亦合祔其壙銘曰

四序殊時五方異土霜秋氣勁崆峒人武夏孽不庭王師
濯涇有帥有士作我長城在章聖世武穆作帥瘞遷拊明
威肅遐裔帥之爪牙姚出良家開斥土境隸我中華仁宗
伐叛平陽血戰將軍從之卒同死難我雖棄車寇亦遁奔
常念邊戍復許稱藩人道所貴曰生與義義苟有在死復
何愧攘敵惟雄盡節惟忠世亦有人繼成顯庸矯矯嗣子
能濟其美並收戰多偕取榮仕天子親郊推恩在朝再頌
卹典賁彼泉蒿朝那故里涇水之涘邱墳在焉過者必止
隴人有言姚爲壯門功名才武父子昆弟定川之殿衆懷

忿怨視被仇方終期盪殄請碑道旁以警諸羌忠義所激
人思奮揚

蘇魏公文集卷五十四終

卷五十四

十五

蘇魏公文集卷五十五

宋太子太保右僕射同中書門下平章事司空魏國公蘇頌撰

清兵部侍郎都察院右副都御史四川總督大理寺少卿裔孫廷玉重葺墓表

職方郎中沈君墓表

君諱衡字公持越州蕭山人也其先世皆不仕至君之皇考始往依其外兄吏部郎王絲以學而君又力志自奮遂中景祐元年進士甲科知台州臨海明州之鄞杭州之錢塘三縣事通判泉州坐法降監衢州清酒務以歲課有羨得便近官復通判濰淄發三州代還主管北作坊充提舉司勾當公事自校書郎十遷至尙書職方郎中衣五品服蘇魏公文集卷五十五

一

爲開封府判官差提點成都府路刑獄未行改判刑部又改三司鹽鐵勾院或權發遣由登聞檢院出知潤州陞對賜三品服到郡以疾得請提舉杭州洞霄宮以熙寧七年六月二十一日終於蘇州之居第享年六十八爲人嚴整守法尤精吏事始爲臨海時年尙少縣境瀕海多聚盜攘羣不逞之徒時或殺傷良民奪其賞貨君悉爲究訪且知主名區處募少壯千餘人一旦與度海以計禽之窮治得其實抵法者百餘輩人自以不寃郡上其事時相才之進官蠟一等錢塘縣倚州郭生齒繁夥而版圖不治賦役常苦不均舊令憚於改作君至爲之升降戶等皆得其實人以爲利泉有二商人負擔出而一人獨過期不返其家意

爲先歸者所殺得做裘與荷擔之人適相類者卽訴於縣
其人不能自直遂誣服誠殺之云棄其屍於溪側官使人
視之則腐敗不可識矣雖縣吏亦以謂真殺人者乃送之
州君省案摘其情曰豈夜半殺人而能負重走百里且至
城下乎且其人存亡未可知因揭於道以訪後行者數日
果有人言常見之於它郡卽召而歸之囚遂得釋一郡皆
歎服濰州有里人欲汙其兄者其兄以告它日遇諸塗而
毆之至於斃州將當其抵死君固爭不得遂請於朝果杖
而釋之在癸日值二浙大水都水范師道奏君提舉蘇湖
常秀水利事因言蒲漭浦可治以泄橫流都水是之方欲
行其說會議論不同而止入朝典領尙方工作事器物皆
蘇魏公文集卷五十五

犀利連中賞格遂自提舉司陞佐省府所至吏憚其詳察
不敢舞以事號稱辦職焉初君罷官錢塘至京師待次審
官當得泉俸而吏受賕匿其籍君懷不平乃訴其事御史
鞠實實吏於法而君卒得泉州轉運使心惡其以爭得官
欲君以事歲中起大獄案治纖毫不貸然皆無實狀乃坐
以官兵送舉子爲私犯遂謫去凡十餘年不徙官會龐丞
相爲淄青安撫還言君淄州治狀始得除過其後數奉詔
推劾大獄能得人情隱伏未嘗有所縱舍以市恩朝議以
幹健許之其撫宗族厚好賙人之急淄守卒賻護其家甚
厚州人有遇毒將死君親爲刺臂和藥活之常推已財以
與同產嫁外女之孤嫠者及其亡也家無餘藏曾祖鄴祖

仁厚父僑以君登朝爲大理評事致仕後贈尙書刑部侍郎娶建陽章氏封某縣君子四人筠常州無錫縣主簿箋蘇州崑山縣主簿籜太廟齋郎筭尙幼女五人太子中舍劉復秘書丞唐穀海州朐山縣尉范汝楫蔡州司戶叅軍龔程杭州節度掌書記程寬皆其壻也君出白屋無當世資藉結髮從士子遊以文學起家祿仕四十年官五品歷臺省刺藩部追責其先君有子第進士女皆從士人亦儒者之榮遇也又能勤刻自任始終一致不爲炎涼易操人或譏其深峭少恩而君自信架篤豈所謂強立不懼者歟諸孤卜以元豐元年二月某甲子葬君於蘇州之吳縣某鄉某原前期與其壻劉復狀君之行事履歷將求誌於墓蘇魏公文集卷五十五

三

石於是次子箋以嘗爲予從子壻自其家來杭請於予顧多事未暇次述及予還京師而君已葬矣箋又繼至其請不已故爲之書其說以表於墓云

墓碣

朝議大夫致仕石君墓碣銘

朝議大夫致仕新昌石君諱牧之字聖咨慶厯二年進士予同年生也姿韻沈雅志操高遠幼無它好惟讀書是嗜未冠從鄉舉籍籍場屋間宿儒父兄行皆器重推先之二十七登科試秘書省校書郎知縣以便親就下補杭州新城尉移台州天台令自初任已有能名於時故相王荆公知鄞縣樞直陳公襄令仙居號江東三賢宰滿歲用薦格

改著作佐郎九遷至朝議比歲課者三遇皇祐明堂嘉祐
治平元豐登極需恩者四見保甲括牧地有勞減年者再
凡知江寧鹽城雍丘三縣通判溫湖舒建四州而江寧溫
湖以別薦服喪避親不赴建安以親疾請侍養不待滿罷
去入朝爲越王宮太學教授監在京麴院其鹽城雍邱越
邸用近臣別薦最後朝選知溫州所至治迹見紀初餘杭
發十縣官部丁夫治浙江隄岸未幾秋潮激齧隄壞獨新
城所治無患太守方公偕嘉之未言於朝增廣天台縣學
擇鄉先生居師授之任以延俊造縣事閒則親爲講說遠
近嚮慕負笈而至者若王景山余京方援伍原輩同時出
壘下後皆爲聞人陳公嘗爲文以紀其事先是邑有母告
蘇魏公文集卷五十五

子不稟教令者訊之無大故乃呼之前喻以子事父母之
道丁寧訓教使急歸奉養後二十年行李過其境上母子
泣拜馬首曰無狀子自蒙教戒感懼惕厲遂爲善良聞者
以爲近古循吏之政鹽城海寇驚撓鄉聚州使督迫追捕
符移狎至初不爲動徐料村社义戶得勇悍敢前者千餘
命軍校部勒教以兵仗寇聞鼠伏烏散熙寧初頒常平發
歛暨役人免募法州縣急於期會因致煩擾詔遣侯叔獻
察訪至雍邱詢之父老咸曰編戶但知變法而不知變法
之擾叔獻以聞朝廷方議褒擢後使者以爲推行未盡而
止然猶被保甲牧地之賞始蒞永嘉病火政素怠颺風至
則焮焰綿亘姦人利救焚數斂吏恬不出寢以成弊因舉

行火保之令預爲約束使知有犯聯坐一日火作親率部伍視畚揭纒缶之不悉力者收之餘悉競前俄頃而撲滅自是其弊遂革又惠州境近鹽鹽禁益密黥隸相望而犯者不少衰止歲課虧損責及郡官於是爲設方畧急監臨而寬捕吏限以賁海之數每亭竈啟閉牢益出納須監官與捕吏親臨銖兩不入私門賈販旣無所得不數月刑省而課羨州郭有通衢名五馬閼塞不通人行久矣問吏屬則曰俗傳闢之利舉子而不利長人乃詆曰有是乎立命撤屋開路自爾通衢不絕後累有登科者溫人至今德之久之治辦益無事間或會賓僚追文酒之樂繼以酬唱篇詠不日盈編軸好事者集成二十卷目曰永嘉唱和云罷

蘇魏公文集

卷五十五

五

郡時年才六十六遂有歸休之志上封告老以本官致仕聖咨早厲士節出處進退不蘄苟得晚年通性命之理視死生窮達爲一致故淡於榮利精力方強遽知止足還鄉里卽祖居爲宴坐之地是時昆弟罷郡退居數人相與遊息山水間友於羣從超然有適如是三年而絕州縣省謁十年而廢宴會撤筆硯十三年年七十九矣盡屏去服玩青編黃卷亦不復問覽居常默坐世累都遣一日盥沐更衣就寢無一語嗒然而逝雖脫屣蟬蛻無易於此時元祐八年冬十一月十三日也有遺書一編疏五十餘事處理家政至於厥歛之具喪葬之節賓客之禮子孫之戒纖悉無遺者門人葉經敘其始末爲往生錄嗚呼達生悟理神

識不昧泰豫若是豈力學行已自我得之者耶其性質純茂孝友忠實雖勉勵敦修之有素抑所稟賦之本厚耶故嘉言美行爲人稱道者多矣少時常贄所爲歌詩於范文正公公謂其孤雁晚望二篇有古人風後以時政十事上韓魏公如錢幣鹽法之類皆見施行在天台日太守元章簡公待以僚友常曰如公文雅縣令淹才煩碎之務委之佐尉可也趙清獻公歸老過溫其子岷方爲倅貳公每戒之曰善事石君曾宣獻公杜正獻公常以在朝不及薦用爲恨觀當時名公賢卿許與之言則人材可知也其著於筆札則有易論解經訓傳雜文歌詩總七十卷藏於家見其書則學術可知也室壽昌縣君王氏尙書屯田員外郎蘇魏公文集卷五十五

六

賁之女子男子五常州晉陵尉景雱早卒進士景需明州奉化尉景零天台令景雱鄉貢進士景震女子七蘇州長洲尉葉庭實澤州陵州令王慶叟南劍州將樂縣令江汝言進士張褫馬景文李景常虞芝皆其婿也諸子世學景需就養不仕景雱踐父官諸婿業官鄉舉有聞孫二十五人曾孫七人景雱等奉治命以紹聖元年十二月某日葬於縣之九巖山某原冢塋封域悉如遺書平日經畫之旨景雱自越千里之潤袖書與祠部君所述行錄見抵且扳先君同榜之契丐文以表墓隧時予方有家故未遑屬藁中歲再至請益愨每念平昔與聖咨遊甚久又嘗論天下士族知新昌之世且嘉孝嗣往復之勲思盡述終之志可

無紀乎案石氏系出青社唐季初祖某避地徙越因家新昌曾祖延俸仕錢氏爲某官祖渥隱晦不仕父待用贈金紫光祿大夫祖孫居越數世百餘年遭聖代右文得以詩書教其子弟天聖中世父待舉始擢進士第官至秘書丞自是登科者常不絕慶厯榜同時昆弟三人在選中而居顯仕者相踵枝葉繁衍從進士者又倍於向時嗚呼盛矣故悉書之又係以碣銘云

學充乎中行著乎外其有云爲名稱必大在已所安存亡進退及物之利中和惠愛仕而知止終遠辱殆沒不怛化遊神定泰嗚呼聖咨考履無悔善生安死令名如在

墓誌

蘇魏公文集卷五十五

七

太子少傅致仕贈太子太保孫公墓誌銘

尚書禮部侍郎叅知政事孫公諱攄以嘉祐七年三月上封求解幾近拜觀文殿學士兼翰林侍讀學士同羣牧制置使後二年二月以疾謝不能朝乞上還所居官拜太子少傅致仕以其年十一月戊辰薨於春明坊居第薨後十月乃克葬於開封縣新里鄉之劉柴原實治平三年七月癸酉也公之薨也天子以先帝執政臣賻卹甚厚爲罷垂拱朝一日特遣中使存問其家事又贈黃金百兩制贈太子太保陞其二子官一等一異姓親爲齋郎有司案禮令集尚書官諡曰文懿其葬也諸孤議請銘於公常所親善者謂無若某厚某於是考察其言行功狀錢於石而納

於曠云公字夢得眉州眉山人初名貫字道卿生五年而學爲詩往往有警句傳於人嘗贊文謁成都尹凌策將以童子薦之顧其幼且孤而止後累舉進士更今諱天聖八年拔甲科擢大理評事通判絳州代還試學士院以太常丞直集賢院判尙書祠部遷開封府推官徙判三司開拆司又試中書以右正言知制誥慶厯二年召入翰林爲學士三遷其官至吏部郎中又帖其職爲兼侍讀學士充史館修撰皇祐五年五月拜左諫議大夫權御史中丞在職二年上書曰臣無狀在臺閣無所補益願得一州以自效朝廷重違其誠而不忍使之去外乃授以學士承旨兼侍讀修撰如舊又再遷其官禮部侍郎嘉祐五年四月程太

蘇魏公文集

卷五十五

八

保戡解樞密上念大臣數以言罷益艱其選用乃不以常次擢公爲樞密副使不盡八月遂參預大政焉其別使自陞近職厯判登聞檢院國子監太常寺兼禮儀昭文館尙書刑部吏部流內銓都省知審官院通進銀臺司兼門下封駁權知慶厯六年貢舉糾察在京刑獄提舉諸司庫務醴泉觀公事磨勘諸路提點刑獄轉運使課績出疆爲契丹國信使其爲中丞以憲臺綱紀百司又有言責故事不兼他職得請解審官自是以爲著令踐二府同修樞密院中書時政記提舉三館秘閣書籍同譯經潤文公自登朝迄謝事揚厯顯劇通三十年惟兩服親喪解職五歲自是不去朝廷特爲仁宗所器待常從容賜對話人君大體公對

曰人君繼天保民惟兢兢勤儉任賢納諫故能享恭己之名而延卞年之慶他日又問求賢致治之道公曰方今天下所謂賢者陛下用之殆遍誠願責其遠致毋以一事不效去之則人人得盡其才而助成治道矣方是時上委政二府而宿望大臣在外者久不進用公意以此感悟上上欣然開納後聞公議事平恕稱之曰老成人所爲固不同在兩禁十五年壹意文翰語未常及朝政暨爲中丞訪天下事有不得於心則抗章論列指切時病一無所避然其言遜而事顯不以激訐爲直欲人主信而易行以此多見聽用內侍王守忠特恩遙領武寧軍節度制下諫官御史固爭不能得公最後上疏曰太宗時王繼恩有軍功不過

蘇魏公文集

卷五十五

九

授宣政使今守忠信宿舊然無繼恩功而節度使將帥極任非特宣政之比若輕授之是棄祖宗法也上卽日爲追寢守忠命溫成后之喪大建陵廟公言本朝宗廟事皆集三省議乃定請以付外如故事不報又合諸御史求對面陳非便至再拜以請上亦爲改容遜謝之其後罷立忌日去廟樂園陵使得更爲監護葬事繫公所啟也在二府雖不久而建言亦多嘗謂承平世邊臣有勞不可以官賞恐微功者生事於疆場三司使宜用敦厚有經術之人使寬天下財利苟以趨辦應猝爲任職則措克之患滋長矣諸公深以其言爲然素喜薦士善論人物其薦御史得今河東經畧唐公介高陽安撫吳公中復皆一時之傑也公再

領太常某時正爲博士數得接公論禮事每議下則使僚屬各陳其所見聞已然後爲之裁定以此知公之所存也公爲人外簡而內嚴謹性至憂畏不妄舉動旣貴益甚人或譏其太過亦不爲少懈至遇事有所陳則挺然若不可奪者然而一出惘款靡有緣飾故言似激而人主不以爲忤性似介而士論不以爲矯蓋其守也固則勢不能撓其發也誠則物莫之忌詩所謂淑人君子其德不回者公得之矣初陳恭公當國公嘗用翰林舊事屢見於中書已觸其怒後恭公復相公適執憲又疏其強毅自任及妾張詔獄事廢置由已專權取必非大臣所宜爲者恭公由是罷政事及薨請謚有司博士初謚榮靈公執不可曰陳公方蘇魏公文集卷五十五

重不倚亦有過人者如此名則已甚矣易曰恭可也論難久不決至請於朝廷又覆於尙書卒用公言爲定於是士大夫稱公平允無適莫者多矣自少好學通古今趣尙體要不以辨說爲博洽每侍邇英閣進讀羣書至前代君臣亂亡禍敗之際昔所諱避不講者未嘗不反覆開陳欲人主洞見本末曰書傳所以記此者正使後世以爲戒故不敢畧也文章質厚簡重自成一體蓋似其爲人有集三十卷目曰某集公年六十九而請還政親舊有勉以年未至者公曰強力而仕不能則止茲可勉乎於是得請休養其家燕閒自適卒以是年疾不起前勉公者乃歎其知命深而信道果也夫人王氏累封某郡夫人夫人同郡大姓也

三姊皆歸里豪生子者又相嫁娶頗以寒士疎公公既貴而三家者有來求昏亦不拒之又爲之保任其子若孫仕者數人子四人珏國子博士佑甫大理評事早卒喆林並太常寺太祝女四人適戎州犍道尉蒲獻卿太子中舍彭敏行都官員外郎勾謙太常寺太祝宋奉國孫七人仕者二人孫氏自吳將武後世居富春其族盛於江東且歷千年未嘗去吳籍至公之七世祖樸乃徙居長安仕唐武宣世掌西川杜棕書記其子長孺亦攝彭山令卒官唐季多故子孫因家於眉山以聚書治產教子弟親田疇爲事而眉人號其家曰書樓孫氏然不仕已四世至公始脫剛畝推生產與諸兄而讀其家書以舉進士及貴贈其曾祖諱蘇魏公文集卷五十五

昭爲太子太保祖諱璋爲太子太傅父諱著明爲太子太師三世之配皆追封國太夫人可謂盛於西南矣而諸孤遵奉遺誠卜葬開封不復西還其後又當著於開封乎惟公以儒生起遠方遭時得君自致公輔行已內信造次必於儒者接人恭而盡誠居官靡有過事艱於進而勇於退卒全功名考終牖下爵位若是器業若是行義若是皆宜銘銘之故史職也銘曰

古之儒者學然後仕語默弛張動必由義其行有常不學不至至之惟難在公無愧公爲邇臣修潔謹純內備顧問進退循循公執風憲其言審審莊色於朝匪躬之憚公貳台司天子之知寵至益戒力極而辭孰謂不爲朝有正議

孰謂進取進輒辭位爰始發蹤暨於考終視其所履無踰厥中匪積之厚爰德之充銘以昭之詔乎無窮

龍圖閣直學士知成都府李公墓誌銘

予志學之歲侍先岐公官洪井因接江西諸彥頗能道江表士大夫之世曰唐季之亂四方豪傑與京都士族往往避地江湖李氏能招攜安輯之故當時人物之盛不減唐日而文風施及其後裔今名顯於朝廷者多矣嘗欲訪求其人而載述其事後與南康李公遊詢其世系則與前說相合公之裔蓋出唐郇公禕之十一代孫濤遭天祐宗室之禍與其父間關南竄流寓湘潭馬商以爲衡陽令時濤之從兄郁爲梁閣門使上言濤失子羈族湖外可哀詔商蘇魏公文集卷五十五

三

遣還京師仕後唐相漢祖厯晉周入皇朝終官兵部尙書封莒國公號爲名臣莒公之還也間道獨行一子不能從遂留江南其裔孫曰宗晦一作誨因占數於南康之建昌縣

生知藉父產棲遁不求仕進鄉里號處士處士生涇水縣尉諱東以子貴贈金紫光祿大夫光祿生公諱常字公擇力學自喜多聞強識爲文章敏捷初若不經思慮及成屬寓深雅識者知其遠器也擢皇祐元年進士甲科厯蘄江二州推官權宣州觀察推官監漣水軍轉般倉年少處小官而方重自持不妄笑語上下敬憚之發運使楊佐欲薦改官公推先其友人劉琦楊公歎曰不見此風久矣乃并薦之琦後亦爲御史名稱當世秩滿改大理寺丞韓康公

任三司使辟爲檢法官徙編校史館書籍英宗卽位命輔
臣舉館職會魯公以公名應詔召試學士院貼秘書閣校
理俄兼史館檢討王荆公輔政大議改更法令與公素厚
引爲制置三司條例司檢詳官兼看詳中書條例並辭不
拜權判尙書考功由太常博士換右正言同主管國子監
公事時始作新法諫官御史論列其非是皆斥不用公力
疏詆之以爲始建三司條例司雖致天下之議而善士猶
或與之至於均輸青苗之法取息歛怨傳合經義天下固
已大駭而善士不復與矣荆公遣其所親厚往喻意不聽
章十數上其言青苗尤切至詔使分析不從家居請罪者
累月於是落校理通判滑州歲餘復職知鄂州徙湖州又
蘇魏公文集卷五十五

徙齊州齊素多盜公至痛懲艾之論報無虛日而不少止
他日得黥盜刺爲郡兵使直事鈴下稍任使之因詢其姦
狀對曰此由富家爲之囊橐官吏迹捕及門禽一人以獻
則免矣公乃令得藏盜之家皆發屋破柱盡拔其根株自
是姦不容匿境內遂清始公在江夏吳興政尙寬簡日與
賓客縱酒嘯詠吏民安樂之郡以大治及爲濟南頗峻文
深詆郡亦大治由是人知其通疎適變所值無不可也是
時河決靈平泛溢山東諸郡公捍禦得其要領一郡獨免
患部使者以聞特詔獎諭徙淮南西路提點刑獄歷尙書
祠部度支員外郎寄祿格行換朝散郎元豐六年召還試
太常寺少卿公以言去國十餘載至是始歸士論莫不喜

其復用旣而以職事陞對占奏閑雅上爲改容及去猶目
送久之遂賜三品服未幾遷尙書禮部侍郎自少常轉儀
曹時以爲美擢後亦少繼者今上卽位進吏部試戶部尙
書詔百官轉對公上七事曰崇廉恥存鄉舉列守宰廢貪
職慎疑獄擇儒師修役法觀其目與當時所宜則公之志
可見矣又案役法差免二科折衷爲書上之大意以爲法
無新陳便民者良法也論無彼此可久者確論也今使民
俱出貲則貧者難辦俱出力則富者難堪盍各從其願則
庶幾可久也元祐赦恩蠲市易通租不滿二百緡者除之
公請累息過其數亦宜勿收而復舒鄂諸州錢冶與泉密
市舶之法其後朝廷多行之速今人以爲便自朝奉大夫

蘇魏公文集

卷五十五

五

五遷至中大夫拜御史中丞兼侍讀加龍圖閣直學士初
河決小吳議者請開淤河分殺水怒自蘇村口截河爲堤
導還故處詔公往視之還奏非便事久未決章至六七上
執前奏不改又遣吏部侍郎范公百祿給事中趙公君錫
覆案如公議罷其役然河之患亦竟未息也其論取士請
分詩賦經義爲兩科以盡學者所長其論省官請別自致
因人兩塗以觀其才實凡所言事多舉大體務在廣諫諍
抑僥倖戒激訐皆本之忠厚篤於世家嘗謂己之所見有
得必入告於上纖悉不隱若其隨時所趣以排擊取合則
不能也其自信如此故忠信密啟世莫得而傳焉罷職爲
兵部尙書辭不拜出知鄧州數月徙成都府行次陝郊暴

疾卒於閩鄉縣傳舍實元祐五年二月二日也訃聞朝廷
士大夫無不駭痛以爲善人云亡國之不幸也公幼有至
性事親謹飭服喪居鄉遠近稱其行義仲兄布早卒事嫂
張敬而嚴視其子如己出自奉清約俸賜皆調其族捐館
之日家無贏貲上賻特厚姚某氏追號某郡太君初娶長
沙狄氏襄陽主簿遵度之女早卒追封某郡君遵度以文
章顯名寶元慶厯間當時名公皆推重之再娶新安魏氏
光祿卿琰之女卒贈遂寧郡君又娶遂寧之弟封安康郡
君子男四摠終揚州江都尉逮承事郎逵超並承務郎三
女婿曰揚州江都主簿孫端亳州司戶叅軍邱楫封丘主
簿黃叔敖公風度凝遠與人交有恩意其所厚善者翰林
蘇魏公文集卷五十五

學士蘇公軾子瞻屢黜齟齬而以詩酬答更相稱譽嘗坐
此贖金而益親不悔少與高郵孫覺莘老齊名俱爲司空
呂正獻公所知期以國器二人官闕趣舍大畧多同數月
之間相繼而逝人甚異之平生所爲文章諸子集爲若干
卷藏於家少時讀書於廬山之五老峯下白石僧舍後雖
出仕宦而所鈔書數千卷留山中如故號其處曰李氏山
房嘗曰生死必歸此其終也諸孤自閩鄉扶柩歸南康時
公之伯兄莘爲江南轉運使遂以其年十月丙午葬公建
昌縣千秋原卒如其志其葬也諸孤來請銘予與公遊三
十年早同官寺又連姻屬論議無間然故知其所存尤悉
大抵推誠接物進退有本末不爲子子驚俗之行其所言

於時有合有不合或以見詆而士論終以長者目之謂其
遠大巨量然官不出六尚書壽止六十四其所蘊積不得
盡行於世嗚呼命也夫銘曰

翼軫之精衡廬之靈鍾秀於人爲時之英彼美公擇得其
粹清氣直而和識遠而明濯纓江湖發藻仙瀛天子命之
拾遺帝庭人許我矯政失吾爭旣出復召道直言行奕奕
奉常巍巍貳卿帝用者舊擢司典刑坐籌省計執憲臺丞
變通盡利獻替輸誠金華進讀疇咨老成兩川遐守千騎
徂徵半途靚閔遂輟修程於嗟國器臨勢而傾三紀立朝
便蕃寵榮五峯舊隱未始忘情生存華屋歿有佳城克終

厥志表以斯銘

蘇魏公文集卷五十五

六

蘇魏公文集卷五十六

宋太子太保右僕射同中書門下平章事司空魏國公蘇頌撰

清兵部侍郎都察院右副都御史四川總督大理寺少卿裔孫廷玉重葺墓誌

壽州霍邱縣主簿宋君墓誌銘

宋氏世占開封蓋得姓授氏之邑也皇朝贈太子左清道率府副率諫始居襄邑鄉里稱長者生內殿崇班良起家爲三班官出掌筦庫治軍旅並有善狀生衢州西安縣令宏少治儒術學易於徂徠石守道春秋於泰山孫明復名重上庠擢進士丙科調亳州衛真縣主簿上官薦其材宜治劇領邑以卒事跡具太學博士曾君旼所敘銘誌予嘗觀其所學自經史百家黃老言至於星厯五行占課象數

蘇魏公文集卷五十六

兵家權謀之書皆貫穿浹洽無不通其書存者多手鈔蠅頭細字幾數十萬言又嘗以其生之年月日時推考星緯叅驗休咎自謂壽不得長故造適任運不靳苟進無幾何以使牒考試它州在道水禍以歿士大夫聞者莫不歎其志於道而安於命也生壽州霍邱縣主簿拯拯字道濟幼歲以父死職事推恩補郊社齋郎孝友敦愿善守家法子以女弟妻之留於家且久知其強敏人也一從進士不中選益自奮早夜誦習書傳課試文賦期於大成有志無命才滿一官年二十八以治平二年遭疾卒於京師儻舍生三子曰育曰充曰高高亦早卒育充力學游場屋不墜門

業然自霍邱之亡子弟繼以淪謝二孤羈寓京口因而著籍宋氏不絕如綫育每追念先世多難率府而下五世藁葬京畿久不得歸大墓也爲世適當任其責而單力不能反葬鄉里常抱終窮之痛因謀於親知曰墳墓近所居則歲時展省不廢旣而卜遷其兆亦從於是裹糧西上千舟有司載其高曾大父母暨父叔季弟凡十三喪以歸買地於京峴北原元豐壬戌六月辛酉旣襄事矣而相冢者曰山高遠地水與風逆神靈弗居育復詢求他師徧求陵阪得崇德里焦石山之東南原地合葬範歲在乙丑月維丙子其日庚申厥利大舉乃啟諸柩厝於新阡率府君位西向大穴崇班霍邱爲二昭西安爲穆二從祖祖父三季父蘇魏公文集卷五十六

二

一幼弟別爲二塋附東南隅同日掩壙事無不及者師言山當巽隅外如拱抱水出庚辛合流江海法曰亡者安而存者利宋氏宜有後矣嗚呼育以孤童自立力貧舉事往返江淮千里負其親喪再歲卜遷卒得吉宅永錫爾類師言其信乎銘曰維家遘屯維子艱勤念所親乎立不逮養死不克葬懷巨創乎五世之喪自拊之陽歸朱方乎始塋京峴山峻水斷居匪善乎通吳之東若堂之封卜之從乎考易之繇有子無咎福厥後乎

龍圖閣待制知揚州楊公墓誌銘

華陽楊氏自漢太尉震四世顯赫子孫散在河洛至唐而

益盛其居鄭州之滎澤者曰尙書左僕射於陵最貴僕射
之六世孫曰江州錄事參軍絳道廣明喪亂因家江表其
子曰津事南唐以言不合去之南越劉鋹用爲尙書水部
員外郎生太子中舍守慶入皇朝爲坊州司馬贈尙書右
丞生翰林侍讀學士諱偕以文武亮直被遇仁宗爲時名
臣其亡也天子思之特贈尙書兵部侍郎侍讀學士生大
理寺丞贈中散大夫諱忱與其弟大理評事慥俱以經術
文章名振一時中散生公公諱景畧字康功四歲用祖廕
守將作監主簿十四上書皇帝言天下事又謁執政論所
以言者丞相富文忠公尤奇愛之初監咸平縣酒務已有
能稱治平二年擢進士第知壽州安豐縣年少領劇邑處
蘇魏公文集卷五十六

之沛然民有賦租不以時入者獨按其大姓與里胥他戶
不督而自集里豪有倚富冒法者以事召至庭下窮竟其
罪得器服擬上方事立寘於法一邑爲之惴惴縣當水衝
歲嘗病涉爲之創巨橋往來者遂無患因目其橋爲楊公
橋安豐代還監京東竹木場兼三司主管權度支判官公
事徒開封府推官就遷判官方朝廷患獄瘡之弊公以謂
護視不謹吏當繩之以法診治有瘳鑿當勸之以賞詔用
其言著爲令接送遼國使者回澶淵例先馳二介以報其
國時耶律用政欲遣三介公執不可甚力卒用常例出提
點兩浙刑獄始至常州訊囚有縣學生具酒食設同舍而
邑令之子預會州鞠以贓罪證逮者百人公以法無飲食

坐贓事卽日盡釋之杭州司理邵權驗囚小不如法已州
罰矣轉運使又劾奏以爲不職詔公覆案公具本未獨保
證之權卒得免自是它州之冤獄滯訟得平反亟決者多
矣公居官勤勤不爲苟簡法或未便卽建明於朝嘗言太
學有歲月之限遠方寒士或以貧或以親不能趨期者請
州置學官如太學法以便科舉又言募官管押諸州綱運
給以道費本欲舒牙校破產之患而守猝有應募者沿法
自利爲國羞辱莫甚於此請下按察官不許押綱令又謂
浙江網罟太密禽魚不得生息請山澤謹其時禁死者不
葬寄骸廬野久則暴露可傷請喪葬限以歲月其恕心恤
隱多此類也閩寇廖德剽掠境上公出兵數百重立購賞

蘇魏公文集

卷五十六

四

上以爲專命奪一官仍故職滿歲移河北東路過都留爲
提點開封府界諸縣鎮公事再領府判官管勾使院公事
提舉三司帳旬磨勘司在府圻宣力居最坐遷局過限及
遣官捕蝗再奪一官未逾月以塞河勞復故制曰河溢原
武隄塞輒平護安居民繁爾能力除書之言若此其治效
可知也元豐六年右司闕員宰相薦者數人神宗曰楊某
可稱其任卽拜尙書右司郎中上言尙書郎官有非才望
者令長官舉行不放上或門止故事未幾遷起居郎使高
麗爲國王祭奠使上諭以此行多欲去者卿在所選也對
曰欲與不欲非爲利卽憚險耳臣知稟命而已公偉儀觀
善辭令至其國舉措辭受言語輕重皆有節適歸則能道

其土風人物禮儀繁畧纖悉不遺深稱上旨就賜金紫之服擢試中書舍人占謝日上曰卿文辭溫潤雅宜典詰近制舍人預押六曹公詳練典故每有大議多引前代以爲據故執政稱其有裨助明年避親嫌換龍圖閣待制知揚州移蘇州復徙維揚元祐元年八月邁疾丁未終於州寢享年四十七公爲人樂易自喜外和而內勁臨事果於行不爲貴勢所屈待下盡禮周旋不懈非意相忤不與校也自與當時名卿遊多見推挹薦舉僚吏幾數百人而無一爲累者豈至誠樂與而不能欺者歟其爲治嚴而不苛在郡公私未嘗以一毫撓民故二州之政從容若無所事而民自悅服至蘇未數月獄無繫者議者以爲自孫冕在鎮蘇魏公文集卷五十六

日嘗獄空逮今八十年復見楊公矣去之日吳人遮道泣涕及卒揚人思之不已舉州爲之設浮屠齋又建祠堂於龍興佛舍拜泣其下雖古所謂遺愛不是過也幼有至性母靜安縣太君盧夫人生公三年而卒後遇盧黨卽涕泣眷慕如母存焉矐其族人不間疎戚賴以存者甚衆尤喜讀書平居佔畢之外無它玩好常以讎校得失爲樂事所藏書萬餘卷猶繕寫不輟又集周秦以來金石刻文至七千卷用以考驗前史疏摭與夫放佚之事其辨博通洽抑有資焉者文集十五卷西掖草二卷奏議三卷執政年表一卷奉使句驪叢抄十二卷少林居士聞見錄十卷公少以名家子有文學以自表志在推己以及物中間屢試權

劇亦有所據發矣兩奪官不以罪觀其過可以知仁也晚
遇主知方見任用而時爲命奪不得盡如其志然見於文
者亦足以識其所存也夫人嘉興縣君韓氏故太師周忠
憲公諱億之孫今門下侍郎維之女賢慧得其門法治辦
家政無不如禮者子男子二曰允某官曰密某官皆向學
有立女子二適宣義郎李持正承事郎韓戢並當時望族
初侍讀公卜地於河南洛陽縣以葬其先君其後遂爲洛
陽人而子孫之亡者相繼耐於其側今允嘗奉公喪以歸
用其年某月某日窆於某鄉某里去祖塋幾里而近葬有
日矣諸孤以沈誌見諉予惟載世名德其所紀述者前有
歐陽文忠公誌在貳卿之墓後則有王荆國公吳正憲公
蘇魏公文集卷五十六

六

銘在中散理評之墓顧鄙文不足以表彰遺德以繼三賢
之後然四世通舊其言行之美多平日之所親見聞者姑
直書其事以成孝嗣之志銘曰

楊氏之顯自震太尉繁衍至唐於陵端揆貳卿皇朝德銘
三世中散不偶內閣復貴內閣之貴天子所知屢試其難
事靡不爲宣慰嶠夷光華遠而書替名命宰司是毗昔使
東南有威有惠更殿大邦不勞而治西閣東臺方竣公歸
豈伊不淑命與時違時哲云亡士類嗟戚我懷世歡其痛
何極凡墓有銘著厥平生一言善志千古英聲貳卿之葬
文忠敘事中散理評師儒誌墓我述遺德以續前詩雖非

麗藻亦無愧辭

承議郎集賢校理蔡公墓誌銘

臨川蔡景繁諱承禧吾亡友濬沖諱元導之子休文諱元翰之從子尙書職方員外郎知南劍州諱宗晏之孫初天禧中我先人與職方公先後爲宜州軍事推官實相交承情好尤厚故濬沖兄弟以文章見知留處門館使某同筆硯習六科景祐五年二君俱以茂才異等召試秘閣時如格者衆遂不得預廷策其後屢試不捷休文卒死布衣濬沖與景繁父子同中嘉祐二年進士第濬沖終南劍州軍事推官景繁由太平州司理河南府軍巡判官改大理寺丞知虔州雲都縣熙寧七年召對便殿訪以時事極陳用人立法之弊擢太子中允監察御史裏行滿二歲加集賢校理提點開封府縣鎮公事入爲開封府推官改判官管勾使院公事兼提舉三司帳勾磨勘司累遷太常博士官制換承議郎出爲淮南計度轉運副使以疾卒於泗州之行司元豐七年十二月某日也景繁初爲州掾時年尙少吏頗易之一日謫其無文鬻獄者上於州州爲斥逐之太守張伯方愛其剛方有守數與議論不以僚掾禮待之其治雩都縣事無細大皆自詳處胥吏畏縮無所措手溪水暴溢幾沒城郭爲之具枋輦以濟生聚而溺者獲出水遇艱食又出常平倉以賑絕乏而飢者不流監司劾奏其擅發倉廩詔釋不治當時論者以爲景繁爲小官能任大責使之遭時得位顧其設施豈易量耶及爲御史論大臣之

任事怙權者拔用親黨遍布要路非國家之福章言廷諍前後十數神宗悟爲之罷免其黨輩者數人又論用兵交趾不可與爭旦夕利所遣北軍難以深入及不宜用中人主兵柄唐季之事可用鑒也凡此皆近臣之所難言者人皆爲之危而上獨稱其忠蓋面賜緋衣銀魚謂曰聊以旌卿諫直耳熙寧某年接伴遼使還獻治邊十三事深極上旨李復圭坐小法罷邊帥張商英以言事黜官景繁連疏救解以爲二人者皆美材可用不當留滯遠方開封府治中貴人獄得其閨門陰事連逮甚衆尹與中人有恩舊遷延不訊景繁卽合同僚辨爭累日至論列上前尹辭誦坐貶官它日上又謂曰尙覽卿臺章甚合理道凡有聞見不

蘇魏公文集

卷五十六

八

可以不在其位而遂鈐嘿也景繁自以起疎遠遭知己之主苟有可裨益時政雖逆鱗選物終無所避就旣而復上數十事多指摘時病竟留中不出議者謂其必復言職俄而有使淮之命其爲使者務要大體嚴而不苛吏有建征利之言者一切不用權廬揚二州雖日月不久而民多能道其善狀大概志在愛君拊民一聞忠義之語必力行而極言之未嘗顧以利害不幸年止五十不得大施於時究極其繆是可傷也自少時篤學力文博記善說進對上前臺臺有緒故屢見稱獎居家教訓子弟講論道義常至夜分善與人交不爲炎涼改觀予家人官其部屬者至則薦之人問其能否對曰吾先人所知其家人固多善士豈必

間也接物和裕侃侃不折雖恭上厚下而不可撓以私周旋族中貧乏待以濟者甚衆尤喜興獎名教誘掖後進零都素少士人人未知學爲之擇秀民以誨導之勉以進取其後成就弟子若郭峻之徒相繼有登科第者邑人懷德至祠而報之夫人何氏臨江著族克配君子能成厥家封崇德縣君二子居厚居易四女二嫁青州范世撫州鄒璠二在室居厚嘗舉臨江進士同試者千餘人首中鄉書以家艱不赴禮部居易八歲亦知向學嗚呼景繁其不亡矣平生所爲文章甚多未遑詮次居厚哀而類之爲三十五卷曰論語指歸十卷曰奏議集十卷曰文集十五卷寶文閣待制何公正臣嘗稱景繁至誠所發本於仁義忠信有

蘇魏公文集

卷五十六

九

遷固之辭有騷人之諷諭有折檻引裾之忠謬聞何公之言可以知景繁之心矣蔡氏出濟陽至唐宏文閣學士允恭始居長安子孫家焉其後南唐清徽殿侍書士煜又居金陵煜之子曰倚復徙臨川倚之孫曰爲政皇朝贈尙書比部郎中職方卽其子也自倚至濬冲六世居臨川景繁嘗遊京口見其山川而樂之曰吾老必歸此於是居厚用其遺言擇地丹徒以元祐元年某月某日葬某鄉某里之西南原因家於潤遂爲潤人也居厚以予其世通舊求誌其墓感今懷昔不得無言又繫之以銘銘曰

蔡出濟陽長安之系允恭仕唐祖煜避地始遷金陵以書入侍再徙臨川服儒數世職方允文首中名第中司薦才

拙於不試徇翔外遷終老州寄二子褒然賢科赴制仲氏
差池殞於壯歲伯也及子同登進士先後祖孫並時兄弟
儒學一門時稱盛事蔚矣集賢幹時良器文中御史簡在
先帝繩糾不私權豪沮氣道直難進勢危易躡出案旬圻
清衷益記入佐京尹復摧寵貴帝曰爾言不繫其位方圻
嘉謀遽膺外任淮海百城徵誅未久輟車一臨民寬吏喘
惟其設施志在經濟千里修塗未半而逝平日有言京口
吉地生居死藏存歿之利嘉哉孝嗣命從其治果得佳城
卒如素志

太常少卿致仕王公墓誌銘

太常少卿致仕王公諱田字介然開封人給事中同知樞
蘇魏公文集卷五十六

十一

密院贈太師中書令諱博文之子贈太子太師諱士安之
孫作坊副使贈太子太傅諱諫之曾孫少以名家子有學
問所與游者多當世間人故累舉進士鑱廳皆拔高名後
以父任爲試秘書省校書郎許州臨潁尉再廕補將作監
主簿故相錢文僖公王沂文正公並薦其才又上所爲文
章三萬餘言召試學士院賜及第四遷太常博士歷尙書
屯田度支兵部三員外郎工刑兵三部郎中初領簽書鳳
翔節度判官鄉民有得遺財於道者遇捕卒拒不伏禽府
尹周式曰此正謂盜而後強者將寘於重辟公獨以闕遺
無強取法拒捕又不以仗故執不敢斷式曰吾爲吏固先
於若豈不曉法爾有異識何不以狀來使吾按治耶公卽

上議狀式意爲解止決杖而釋之會中令尹岐徙鎮國軍未久求侍養還京師管勾左右廂店宅務視邸舍有不葺與民占冒無籍者謂官爲繕完畫間架使增僦錢由是二歲中溢舊課四萬緡用前勞陞知通利軍始至決滯獄數十人自是庭無留事都轉運使楊偕孫祖德高覲相繼言其治狀以父憂去職又服母喪通五年而除起監在京左藏庫前此出納庫籍惟載正數其羨贏皆不會積久鉅萬主吏得以轉移爲姦公至則操簿書坐帑中鈎索隱漏得籍外金帛及軍賞折直高下不當償者悉條其數上三司三司更命他官按驗得實計其所收物直三十六萬七千緡以其事聞於朝廷擢爲羣牧判官滿歲制置使王祁公蘇魏公文集卷五十六

奏公嘗出邢洛諸州治監收水害有效請留再任又一年權開封府判官出黜江東刑獄尋移遷江西皆自陳不願行留判三司戶部句院拜京東轉運使又辭不願行以使者秩移知襄州是歲飢歉山南尤甚公募豪姓出粟萬餘斛造饘粥哺流民賴是全活者甚衆故中書舍人胡旦旅殯在郡邸其子孫孱不能舉葬且三十年矣公爲作奏曰旦有大名嘗爲先帝近臣朝廷宜厚恤之詔以庫錢二十萬畀其家具葬公又命書記石溫主其事爲之擇善地安厝如禮餘錢以給其孫郡人聞之喜且歎曰胡氏存歿獲濟矣在郡才五月召還復判戶部句院滿四歲當出補外官又自陳願領京師閒曹徒判尙書倉部後五年以亞卿

謝事又二年年七十五卒於清和坊之私第卒後七月諸孤自京師奉其柩葬於孟州沁水縣萬山原先塋之左次實治平二年十一月甲子也公爲人淳厚謙恭不自標置接人必盡誠禮見親戚與賓客無少長貴賤皆局局然奉之不少墮語言洞見底裏不爲隱欺而人與之接者退而必曰真善人也然而當官閱簿持法律精密審詳且雖甚細微亦不敢忽慢故所歷十三官皆以勤事著稱而無毫毛過失其中心慈不忍蓋出天性非勉強所至見人議法苟有可以生出之路雖非己者亦從容爲言及聞有所平反則喜如出諸已少時數隨侍在官中令每閱案牘多焚香過閣中情有疑者密以問公公對曰法重情輕不如從蘇魏公文集卷五十六

輕中令深嘉納之自終親喪後不復主家事門內之治一以委諸弟惟葺居第日往河外購良材歸則親督工程頗務崇壯是時太夫人在堂見而召諸子語之曰中令旣棄捐若輩復安用此大屋乎公對曰王氏自高祖以來由祁魏曹洛遷徙者數四靡所定處自先人之來京師始得此第經營艱苦每患其庫陋數欲增大之而未及就某等雖不肖所以盡力於此者將畢先志耳及成室昆弟未嘗坐堂寢中雖待賓客亦就偏廡示不敢據先君之正處也景祐中從祖睦卒官江西三孤女貧不能自還中令方以爲憂會病且革以屬公公卽冒江湖往返數千里提攜以歸嫁之輒得賢壻其後二爲大官一爲朝士故翰林侍讀學

士楊安國今龍圖閣直學士韓贄駕部員外郎綦愿是也於時言家法者以爲美談公前後三娶皆顯族初配高氏秘書監志寧之女次配許氏刑部郎中韓之女並早亡不及封今夫人李氏亳州刺史周之女號金城縣君子男九人曰岫太子贊善大夫曰岐曰岨曰嶧京司官曰嶧瀛州樂壽縣尉曰嶧曰嶧選補官曰岨幼未出仕女八人一適工部郎中集賢修撰知桂州陸詵一適衛尉少卿趙尙寬六幼在室諸孫九人男皆傳其家學女必得佳士而歸之可謂善治家矣初中令在近密公已爲郡守後二十八年亞弟疇復爲樞密副使時公已得謝還第見其登用士大夫來慶拜者日盈其門且推福於公及其葬也副樞之喪蘇魏公文集卷五十六

三

又同舉事儀用三品而公柩在前州縣過喪亦如常禮始卒哀榮其盛也如此豈非積善之報歟公素無疾暨副樞之薨哀慟累日家人怪其傷悴過甚旁爲開譬公曰吾非不知命也但念吾弟生二歲而失先夫人吾嘗躬自復育又見貴顯一旦先我而逝感今懷昔可遽解耶自是悵悵彌甚相距五十餘日而終嗚呼可哀也葬有日諸孤以僕接公有年又僕之仲弟亦許氏姻也用是累來請誌於壙旣不得辭又爲之銘曰

不矜其容不暴其終仕而行已惟義之從靜以遠晦明以保躬吉人之履君子之終天錫多福惟享其厚好德康寧考終以壽萬山公塋昭左穆右體魄旣安慶鴻厥後

蘇魏公文集卷五十六終

十四

